



鴻苞集卷之三十一

明東海屠 隆緯真著

西吳茅元儀公選訂

吳應元允大校

漢武帝

漢武帝外傳載西王母降武帝靈蹟瓌竒文章雄  
麗不知何人所作當是漢時近代人爲之果有此  
事武帝不應晚而歎曰天下豈有神仙如外傳不  
虛則史臣安得撰天下豈有神仙一語外傳之言

實則史臣重誣史臣之言真則外傳必僞然當時  
若茫無王母降臨一事而鑿空杜撰輝煌鋪張古  
之人不應敢於作僞一至于此以今觀於曇師之  
侍王母其事灼灼則外傳之文定當不誣腐儒作  
史大抵夏虫之見著此一語以衛儒教破世惑如  
張良仙去必非病卒淮南冲舉必非反誅此意耳  
黃帝之騎龍鼎湖周太子晉之接浮丘伯穆天子  
清靈真人中侯夫人昭靈李夫人太虛南岳真人  
方諸青童南極紫元王夫人之降楊長史漢晉名  
臣劉寬郗鑿俱入仙府張道陵許遜俱顯拜天詔  
玉勅麻姑王方平降蔡經家上帝美臣過邢和璞  
鍾離權呂洞庭皆訪陳搏白居易故宅在蓬萊山  
李太白爲蓬萊仙卿歐陽修入神清之洞古今鑿  
鑿如此世之拘局儒者豈盡得而湮沒之哉

卷之三十一  
二  
變收出世之味同壽者豈盡野而野之哉  
李太白爲養萊山嘯桐陽人軒輊之同古今  
甄黜黜曰同到皆信刺黜曰武湯姑字在養萊山  
王煉麻故王太平劉蔡整家上帝美曰歐派味  
田隆實添鑿身人山刊眾戲刻信綴其顯拜天陪

列仙傳補

歷代仙真載在列仙傳真誥群仙通鑑及諸道藏  
書詳矣惟我朝仙真未有傳記僅散見于稗官  
小說余恐靈蹟失傳玄風湮沒漫考而記之名曰  
列仙傳補

周顛仙

周顛仙不知其名自言建昌人混迹行乞舉止譎  
詭元末往來江楚間見人呼曰告太平

高皇帝定南昌顛仙謁於道左帝歸建業顛仙

亦來送之僧院肆侮緇流群僧訴 上上惡而欲  
除之顛笑曰公安能死我耶金刃水火安能損我  
一毛哉 上怒裸置石臼以缸覆之積薪舉火火  
滅發缸端坐無恙 上征陳友諒以問顛顛仰視  
良久曰天上無此人分可征也遂從 上行抵小  
孤山見江豚戲水中顛漫言水怪見損人多 上  
惡其惑衆沉之水不能溺自此去不見後數年顛  
仙遣天池寺赤腳僧至京師見 上上以詩二首  
寄之又四年 上偶不豫赤腳僧復至言天眼尊  
者及顛仙從廬山竹林寺遣送藥來 上服之病  
愈乃遣行人至廬山尋訪道士指曰顛方與天眼  
尊者在竹林寺對弈行人致 上命顛殊不爲禮  
侍立良久累請命顛乃引之觀內殿堂軒廡弘麗  
光曜非復人間顛與天眼尊者各以一詩寄 上  
使行返顧寺不復見矣

張三丰

張三丰號玄玄子又號邈邈遼東懿州人張仲安  
第五子也寓居鳳翔寶鷄縣之金臺觀修煉忽畱

頌而逝土民楊軌山歿之臨窆復生以一小鼓留  
其家入蜀轉楚登武當山洪武二十四年 詔求  
之不得永樂中 上遣禮科都給事中胡濙遍詣  
天下名山訪之不遇天順末或隱或見有問以大  
道者專以仁義勸人事皆先見往來鶴鳴山半歲  
失所在嘗至甘州張指揮家遺一中袖及葫蘆天  
順間甘肅總兵官王敬患中滿疾諸醫不能療以  
中袖火煨服之愈後葫蘆忽自震碎留楊氏小鼓  
雖憂大鏞不能混其聲後亦亡去嘗遊揚州瓊花

觀有題瓊花詩曰瓊枝玉樹屬仙家未識人間有  
此花清致不沾凡雨露高標猶帶舊煙霞歷年旣  
久何曾老舉世無雙莫漫誇便欲載回天上去擬  
從博望借仙槎語意蓋自況也又一說張三丰名  
通號玄玄子天師之後寓居鳳翔寶鷄縣之金臺  
觀修煉洪武壬申嘗應蜀獻王之召辭還山金時  
人也元時與劉太保秉中冷協律啓敬同遊又與  
寶鷄西關道士李白雲善又一說張三丰宋時人  
爲華州掾嘗從州太守入華山訪陳搏先生遇呂

純陽授以仙棗得道我 文皇開邸北平嘗召見  
之語有神異及卽位思慕甚篤遣胡尚書淡遍海  
岳訪求于秦中邂逅宣述 上意隨到見 上問  
之曰何爲是道曰能食能糞此卽是道上不悅曰  
卿有仙術爲朕試之張公卽指一甕曰臣欲入此  
以觀造化卽捉足縮首頃刻不見呼之則諾視之  
無形 上命擊破之使人各持破甕一片隨呼皆  
應 上曰卿可試出言訖張公忽在前 上曰卿  
可更窮造化之道曰諾卽走入柱中呼之復出

上歎曰妙哉張卿出幽入冥其至神乎公復取水  
嚙于中庭須臾變成巨川隔岸沙際橫一渡舟公  
舉手招之登舟而去不知所之後 上患疾食不  
下始悟公言初公畱一草與胡尚書 上服之病  
愈

冷啓敬

冷謙字啓敬湖湘人 國初爲協律郎郊廟樂章  
多所撰定謙有故人貧不能自存知謙有異術求  
濟於謙謙曰汝命薄吾指汝一所有羸金二錠可

以資助但勿過取不聽吾戒吾與汝皆不利也乃于壁間畫一門一鶴守之令其入敲門門忽自開入其室金玉爛然盈目其人恣取以出而不覺遺其引他日內庫失金守藏吏獲引以聞執其人訊之詞及謙因併逮謙將至城門謂逮者曰吾死矣安得少水以救吾渴守門者以瓶汲水與之謙遽隱瓶中守者懼罪携瓶至御前上問之輒于瓶中奏對上曰汝出見朕朕不殺汝謙自言臣有罪不敢出上怒碎其瓶片片皆應終不知所

在張三丰嘗跋謙畫蓬萊仙弈圖曰蓬萊仙弈圖者龍陽子湖湘冷君所作君武陵人名啓敬龍陽其號也中統初與邢臺劉秉中仲晦從沙門海雲書無不讀尤邃於易及邵氏經世天文地理律曆以至衆技多通之至元中秉中恭預中書省事君乃棄釋從儒遊雪川與故宋司戶叅軍趙孟頫子昂於四明史衛王彌遠府覩唐李思訓將軍畫頗然發之胸臆遂效之不月餘其山水人物窠石等無異將軍筆法傳彩尤加纖細由此以丹青鳴當



時於淮揚遇異人授中黃大丹出示平叔悟真之  
旨穎然而悟至正間則百數歲矣綠髮童顏如方  
壯不惑之年時值紅巾之暴君避地金陵日以濟  
人利物方藥如神此卷乃至元六年爲余作也余  
將訪冷君於十洲三島恐後人不知冷君胸中丘  
壑三昧之妙不識奇仙異筆混之凡流故識此永  
樂壬辰孟春三日三丰遜老書

尹攀頭

尹攀頭名繼先臨洮人目見徽欽北狩時事至元  
得禮部度牒爲僧遇異人授以接命之術元末常  
乘黑驢遊燕雲間接命於真定遇群盜奪其驢刀  
傷其身首遂入滇南山中避亂景泰中時往來荆  
襄陝洛間成化末過江西有宗室叩其術不答宗  
室怒杖之垂死令置棺中昇出生焚之尹密告昇  
棺人曰死則死矣幸微露竅穴少便呼吸其人憐  
而許之及舉火空棺耳遊南都成國朱公見所佩  
元時羊皮度牒相與駭異知其年且二百餘矣正  
德初太監賴義召至北京劉瑾時方竊權欲以威

劫其術尹終無言瑾怒遂以妖言惑衆緝送法司  
議歿司寇閔公珪止令招年九十免死押發原籍  
鉗束後於鐵鶴觀發土得鐵鶴跨之飛去初在刑  
部問官叩其術合用頰人否領之而已或再三問  
之自言每一接命必得奇禍是獄也豈其餘歟乎  
對問官惟請歿期略無懼色一食能盡胡餅數十  
酒數斗或數日不與亦未嘗告飢平居惟單衣袍  
隆冬不寒

### 赤肚子

赤肚子不知何許人正德末忽至密雲就人家屋  
簷下居冬月雖大風雪身無寸絲惟以氈方寸餘  
蔽其前後或一食能兼數人或數日不食兩手指  
長拳曲不舒人問之不答一日有道士乘驢過之  
赤肚子遽起隨入一野廟中相對悲泣講論通夕  
而別 憲廟時又有王野極封太玄真人分宜曾  
有詩贈之又有麩子李在太和余從侄大山中丞  
奉 詔修太和曾訪之山中

### 雷擊頭

雷攀頭者名太雲不知何許人少爲書生好道術入沙門遊又棄而學仙成化間居太和山中蔽衣蓬首行若飄雲人或于山下見之或失所在舉頭望之遙在高崖雲霧中相距萬仞荆王求見之固請曰願乞片言太雲曰予丐人也何足以語仙王曰汝年幾何曰半歲王曰汝何許人曰幽州生建康長廣東編戶遼東應役王憊然不悅大相訾詆欲殺之忽不見

呂疙瘩

呂疙瘩者不詳其名里成化間嘗遊於襄鄧河洛間冬則臥雪夏則被褐好狎兒童且謔且詈競爲之結小髻每搖首則髮理如櫛復爲結之如螺然滿頭時人呼爲疙瘩一日履江水上弘治己未於隴右白日上昇

張皮雀

張皮雀名道修吳人父爲江西叅議少而好道後爲道士師事胡風子胡風子師事莫月鼎授五雷法道修得之驅風雷如神常懷一皮雀狎小兒每

出則小兒群逐之故時人謂之張皮雀好飲酒食  
狗肉嘗有病瘡者求治會方啖狗肉遂以汁濡作  
符授之曰謹握之及家而後啓其人曰何物能治  
疾耶途中竊視之忽有神人怒撻之幾絕往往爲  
人禱雨大著靈應以壽終化後人於松陵長橋上  
見之

### 鐵冠道人

鐵冠道人張景和江右人道術甚高人不能測

太祖初駐滁陽道人詣軍門謁曰天下大亂非命

世之主未易安也其在明公乎 上問其說對曰

明公龍瞳鳳目狀貌非常貴不可言若神采煥發

如風掃陰翳卽受命之日也 上奇之畱于幕下

屢從征伐 上與陳氏相持每令望氣以決休咎

言出必驗鄱陽之戰友諒中流矢歿兩軍皆未知

道人望氣知之密奏曰友諒死矣然其下未知猶

爲之力戰請爲文以祭使死囚持往哭之則彼衆

氣奪而吾事濟矣 上從其言漢兵遂大潰 上

定鼎金陵凡諸營建必令道士相地初徐武寧王

爲列將時道人謂之曰公兩顴赤色目光如火官  
至極品所惜者僅得中壽耳後果以五十四而薨  
諷梁國公藍玉不忠後玉竟以謀逆誅一旦無故  
自投於大中橋水死 上命求其尸不獲已而潼  
關守吏上奏云某月日鐵冠道人策杖出關計之  
正其投水之日也

程濟

程濟朝邑人有仙術不知何所承授嘗爲四川岳  
池縣教諭相去數千里旦暮未嘗離家而日治岳  
池事不廢革除中上書言西北方將有兵起當預  
爲之備 朝廷欲以妖言罪之靖難師起使護軍  
北征 文皇濟江亡命不知所終

劉偉

劉偉朝邑人以鄉舉爲文水令擢御史所至皆不  
嚴而治純孝盛德好神仙比疾病命其子曰卽歿

毋埋我及死其鄉人有自遠方還者多從道中見之寄問及其家其子因不敢葬其甥都御史韓公邦奇爲山西僉事方視事忽聞人持偉名紙入報韓驚起憲使張公璉問之韓公云舅氏歿久人傳仙去某未之信今通名紙者卽其人也憲使問狀門者言此人戴古氈笠青絹袍一童子扶之肩布囊立門外遂命延從入中道緩步而前韓公遙識之遽起迎候於是同僚悉下階揖入起居無異平生但簡言問之則對坐定手接茶而不飲坐中亦莫

敢先發言韓公起邀就旁室中相勞苦答曰久別特遠來視汝語及家事頗作悲泣之狀韓款留不可卽起別去一僚曰聞公已死今何在曰我不死汝則要死別去謂韓曰汝弟邦靖可令速歸出門復攜童子飄然而去不知所往俄而此僚及邦靖相繼死劉氏聞之發棺視惟一履在焉

### 王士能

王士能海州人生元至正甲辰入國朝成化癸卯已一百二十歲少慕養生辭家走四方求名師

無所遇入蜀聞雪山有異人往投之見老人披氊  
衣卧深洞中石牀上長三尺餘五官手足皆如嬰  
兒能拜之不答因爲之執役左右老人不飲食坐  
側一囊所盛類乾麩時取啖之掬飲澗水士能留  
數日所齋米盡跪而乞食老人分囊中物與之苦  
澁不能下咽乃拾山果野菜以充腹居三年勤苦  
不歸老人憐之曰子可以語道矣然子得之當出  
山他日非其人勿輕授也遂示以攝形煉氣之要  
學成辭出來居濟寧日不火食惟啗棗數枚或菜  
數莖飲水少許而已白髮被額肌膚如童子少婦  
濟寧指揮王宣亦海州人往見問姓名大驚曰聞  
吾祖言吾上世有叔祖實名士能好道出家不知  
所終翁殆是乎問以家事所言皆合宣有同官欲  
授其術士能望見曰爾聲伎滿前日事妄作非吾  
徒也其人大慙乃上疏言狀 朝廷下山東守臣  
俾乘安車入京見 上賜寶鑑遣歸程敏政學士  
與之語多靜坐寡欲之說坐久瞑目閉息曰老僕  
無能爲 朝廷過聽而召之僕豈知道但習靜日

久近日乃與人接大敗吾事矣問以元末國初事  
曰一身之外皆非所知也吳楊循吉嘗問其所以  
致壽曰無他術也但平生不茹葷不娶妻不識數  
不爭氣耳

### 李福達

李福達關中人有仙術善黃白聚徒頗衆爲撫按  
所奏世廟時詔逮捕至京入見武定侯郭勛勛  
欲試其術一巨銅火爐以藥點之卽成銀勛爲營  
解得免京師有段癘子者得其藥上聞而索之

點化以進藥盡賜死福達東遊吳會王元美兄弟  
陸文裕太史皆從之遊諸公宴之一日約與諸公  
答席及期而往一室空無所有頃之敲壁門啓席  
設甚盛復有歌舞都雅諸公錯愕有竟不敢舉匕  
箸者後不知所終

### 王威寧

王越字世昌安陸人登進士爲人英爽磊落有經  
略才以邊功封威寧伯後傳仙去踪跡多在太和  
余侄大山中丞曾訪之不遇其子本峻作中丞年



譜書云某月日訪故威寧伯王越于山中即日遁去本峻此語必有所據又豫章羅文恭洪先餘姚王文成守仁閔中林尚書俊吾鄉萬都督表皆相傳得道不死人往往有於山中見之者數公皆異人理或有然者以俟再訪

王無何

瓊笈考

崑崙山有五城十二樓玄圃臺積石瑤房閼風臺  
 華蓋其下有翠水赤水其高出日月之上為天之  
 中柱山有九層第六層有五色玉樹蔭翳五里百夜  
 至水上其光如燭第三層有火穉一株滿車有瓜  
 如桂有奈冬生碧色第五層有神龜長一尺九寸  
 有四翼萬歲則升木而居亦能言第九層下有芝  
 田蕙圃傍有瑤臺十二又崑崙有沙棠木黃華赤  
 實其味如李食之使人不溺有紅玉之草食之醉

三百歲河源出于崑崙是爲西荒西王母居之又  
名龜臺金母元始授以萬天元統龜山金光之籙  
使制召萬靈統括衆真位配西方母養群品天上  
天下三界十方女子之登仙得道者咸隸焉赤松  
子神農時爲雨師止西王母石室中能隨風雨上  
下有服水玉法又云崑崙之圃閭風之苑有城千  
里玉樓十二瓊華之闕光碧之堂九層玄室紫翠  
丹房左帶瑤池右環翠水其山之下弱水九重洪  
濤萬丈非飈車羽輪不可到也周穆天子乘八駿

以龜鼉魚鱉爲梁渡弱水至崑崙見西王母西王  
母觴穆天子瑤池之上作白雲之謠西有金母東  
有木公木公生於碧海之上芬靈之墟亦號東王  
公三界十方男子之得道者咸隸焉東海蓬萊山  
亦名防丘亦名雲來東有鬱夷國金霧諸仙居之  
山上架樓室常向明以開戶牖及煙霧滅歇戶皆  
向北西有含明國仙人綴鳥毛以爲衣承露而飲  
有葭紅色可編爲席有浮筠之斡葉青莖紫子大  
如珠有鳥名鴻鵠色似鴻形如禿鶩腹內無腸羽

卷之三十一  
一七  
翮附骨而生無皮肉也雄雌相眄則生產南有鳥  
名鴛鴦形似鴈萬歲一交生雛千歲銜毛學飛蓬  
萊山下無風而洪波百丈有九氣丈人九天真君  
宮俱以黃金爲屋白玉爲牀安期生別秦始皇畱  
賜金壁脫玉舄置阜鄉亭報曰後千歲求我蓬萊  
山下負局先生以磨鏡遊吳市後還蓬萊山初從  
吳山語人曰吾還蓬萊爲汝曹下神水崖頭一旦  
有水白色流從石間來下愈人疾病又衛叔卿羨  
門子王方平麻姑常遊此山方丈之山一名巒雉

東方龍場地方千里玉瑤瑤爲林雲色皆紫山西有  
照石去石十里視人物之影如鏡焉碎石片片皆  
能照人而質方一丈則重一兩通霞之臺有衆鸞  
鳳鼓舞如琴瑟和鳴神光照耀如日月之出臺左  
右種恒春之樹葉如蓮花芬芳如桂花隨四時之  
色有草名濡麩葉色如緝莖色如漆細軟可縈海  
人織以爲席薦卷之不盈一手舒之則列坐方國  
之賓莎蘿爲經莎蘿草細大如髮一莖百尋柔軟  
香滑群仙以爲龍鵠之轡瀛洲一名魂洲亦曰環

洲東有淵洞有魚長千丈色斑鼻端有角時鼓舞  
羣戲遠望水間有五色雲就視乃此魚噴水爲雲  
如慶雲之麗無以加也有樹名影木日中視之如  
列星萬歲一實實如瓜青皮黑瓢食之骨輕上如  
華蓋羣仙以避風雨有金巒之觀飾以衆環直上  
千雲中有青瑤瓦覆以雲紈之素刻碧玉爲倒龍  
之狀懸火精爲日刻黑玉爲鳥以水精爲月青瑤  
爲蟾兔於地下爲機杼以測昏明不虧弦望時時  
有香風泠然而至張袖受之則歷年不歇有獸名

嗅石其狀如麒麟不食生卉不飲濁水嗅石則知  
有金玉吹石則開金沙寶璞粲然而可用有草名  
芸苗狀如菖蒲食葉則醉餌根則醒有鳥如鳳身  
紺翼丹名曰藏珠每鳴翔而吐珠累斛仙人常以  
其珠飾仙裳蓋輕而耀於日月也員嶠山一名環  
丘山有方湖周迴千里多大鵲高一丈銜不周之  
粟粟穗高三丈粒皎如玉東有雲石廣五百里駁  
駱如錦扣之片片則翕然雲出有木名猗桑煎樾  
以爲蜜有冰蠶長七寸黑色有角有麟以霜雪覆

之然後作蠶長一尺其色五彩織爲紋錦入水不濡以之投火經宿不燎唐堯之世海人獻之堯以爲黼黻西有星池千里池中有神龜八足六眼背負七星日月八方之圖腹有五岳四瀆之象時出石上望之煌煌如列星矣有草名芸蓬色如白雪一枝二丈夜視有白光可以爲杖南有移池國人長三尺壽萬歲以茅爲衣服皆長裾大袖因風以昇煙霞若鳥用羽毛也人皆雙瞳脩眉長耳食九天之正氣死而復生於億劫之內見五岳再成塵

扶桑萬歲一枯其人視之如旦暮也岱輿山有員淵千里常沸騰以金石投之則爛如土矣孟冬水涸中有黃煙從地出起數丈煙色萬變山人掘之入數尺得燧石如炭滅有碎火以蒸燭投之則然而青色深掘則火轉盛有草名莽煌葉圓如荷去之十步炙人衣則焦刈之爲席方冬彌溫以枝相摩則火出矣南有平沙千里色如金若粉屑靡靡常流鳥獸行則沒足風吹沙起若霧亦名金霧亦名金塵沙著樹粲然如黃金塗矣西有玉山其石

五色而輕或似履舄之狀光澤可愛北有玉梁千丈駕玄流之上紫苔覆漫味甘而柔滑食者千歲不飢傍有丹桂紫桂白桂皆直上百尋可爲舟航謂之文桂之舟有七色芝生梁下其色青光輝耀謂之蒼芝熒火大如蜂聲如雀八翅六足梁有五色蝙蝠黃者無腸倒飛腹向天白者腦重頭垂自挂黑者如鳥至千歲形變如小燕青者毫毛長二寸色如翠赤者止於石穴穴上入天視日出入恒在其上有獸名嗽月形似豹飲金泉之液食銀石之髓此獸夜噴白氣其光如月可照數十畝有遙香草其華如丹光耀入月葉細長而白如忘憂之草其花葉俱香扇馥數里其子如薏中實甘香食之累月不飢渴體如草之香久食延齡萬歲仙人常採食之已上諸山俱靈人真仙居止仙人修成大道而或功行未滿機緣未至未得昇於清微大赤諸天且遊行海外仙山待功滿昇遷天界故與塵土隔絕凡夫俗人不得一至其地秦皇漢武雖復褰裳濡足竟不可得也海外又有十洲亦仙人

所居又地下洞天福地甚多靈蹟神界隱闕不聞於人間人莫得而指數也中岳嵩高山在河南登封縣其山東爲太室西爲少室相去十七里謂之室者以其下各有石室焉山海經曰太室之山其上有木焉葉狀如梨服者不妬有草焉其狀如禾服者不昧又曰少室之山有木焉名曰帝休葉狀如楊枝黃花黑實服者不怒漢世有道士從外國將貝多子移種於嵩高西麓有四樹與衆木異一年三花白色香美太清真人宋倫下司中岳嵩高

山神仙之錄又東郡沈猷采藥於嵩嶽見仙人冠謙之身作銀色光明如日周靈王太子晉好吹笙作鳳鳴遊伊洛之間浮丘公接以上嵩高山三十餘年後於山上見桓良曰告我家七月七日待我緱氏山頭至日果乘白鶴駐山巔望之不得到舉手謝時人而去緱氏山亦名緱嶺近在嵩山之西也後子晉主治金庭洞天號爲桐栢真人當是升緱嶺後奉上帝命理金庭洞天也少室山有少林寺有達磨面壁菴菴有石影畱達磨面壁九年之

蹟拭之愈顯二祖慧可至此求法於達磨侍立雪  
深至腰不去又至斷臂乃得其法今寺存立雪亭  
又有甘露臺胡僧跋陀於此翻經天降甘露會善  
寺唐有高僧晏公於此講法華經龍作人來聽晏  
知其龍也告以寺乏水遂送一泉以供僧汲西岳  
太華山在關中華陰縣山海經曰太華之山削成  
而四方古語云華山對首陽山黃河流於二山之  
間過之而曲行河神巨靈以手擘開其上以足踏  
離其下中分爲兩以通河流今山上手掌跡俱存

山有芙蓉明星玉女三峯又有玉女洗頭盆周宣  
王時馮長字延壽授書爲西岳真人掌西岳神仙  
之錄又李翼爲西岳仙卿焉明生從安期生受金  
液神丹入華陰山中合金丹升天修羊公止華陰  
山石室中有懸石榻卧其上石盡穿陷毛女乃秦  
皇宮人入華陰山中食松脂栢葉體生綠毛呼子  
先令仙人持二茅狗來與酒家媼俱騎升天乃二  
茅龍也呂洞賓於華山酒肆遇鍾離雲房隨入終  
南山授金液還丹大道又唐玄宗妹金仙公主于



此山駕鶴上升陳圖南先生隱此山雲臺觀後蛻骨于此至今尚在按希夷先是隱武當有五老人來聽講易謂希夷曰吾輩日月池中龍也此非君所棲令其閉目凌空馳風及張目已在華山石上希夷之睡乃五龍蟄法龍所授也希夷脫化張超谷漢張公超隱華山南能爲五里霧故此處遂有公超霧市又漢衛度世入華山尋父叔卿見叔卿與洪崖先生巢父許由大低公飛黃子王子晉薛容博戲石上東嶽泰山在山東泰安州東嶽主召

魂東方萬物始成故主人生命之長短東有東嶽西有酆都皆主掌人生死之籍東主岳帝西主冥官也云岱宗者東方萬物始交代之處宗長也王者易姓受命必告成於岱宗也封泰山禪梁父封禪之文古帝王有七十二家藏之金匱玉牒泰山盤道屈曲而上凡五十餘盤經小天門大天門山峯有日觀秦觀吳觀周觀日觀者鷄鳴見日出海底秦觀者望見咸陽吳觀者望見會稽周觀者望見齊地登山絕頂下視齊州九點黃河如帶小天

門上有秦時五松秦始皇登山避雨松下封五大夫上山又名十八盤有百丈崖有丈人石山上有王母祠王母池有呂巖呂仙石像存焉有碧霞元君祠相傳碧霞元君者天帝孫女也今遠近士女焚香朝謁者日以千萬又馬明生遇太真夫人攜至岱宗石室中其中金牀玉枕几有素書夫人時時與仙人賓客乘龍駕鳳往來明生執役勤肅夫人後召安期生令授以金液八丹仙去又有泰山道士稷丘君章甫黃衣擁琴叩漢武帝又有泰山老父武帝登山見老父鋤於道間頭上白光高數丈北岳恒山亦名常山在北京真定府曲陽縣西北一百四十里水經著其高三千九百丈又爲玄岳杜光庭福地記稱常山爲總玄洞天山上有聚仙臺太史云北岳有五名一名蘭臺府二名列女宮三名華陽臺四名紫微宮五名太乙宮按山有太玄之泉神草十九種道者採服之成仙中條山張果曾入恒山唐玄宗召見欲以玉真宮主降之固辭南岳衡山在衡山縣寰宇記云宿當翼軫度

應機衡故曰衡山衡山南岳軒轅黃帝乃以潛霍  
二山爲副漢武帝徙南岳之祭於廬江瀟山承軒  
轅副義也衡山有七十二峰十洞十五巖三十八  
泉二十五溪九池九潭九井而峰之最大者曰祝  
融紫蓋雲密石廩天柱岫嶺回鴈芙蓉惟祝融爲  
最高赤精子在顓頊時降于南岳芙蓉峰說微言  
經今芙蓉峰有傳經壇禹治水登衡山岫嶺峰血  
白馬祭山神夢赤繡文男子稱玄夷蒼水使者謂  
禹曰欲得我山神書者齋於黃帝之宮禹乃退齋  
三日登宛委發石得金簡玉字之書得治水之要  
道書云衡山爲朱陵洞天魏夫人華存授天人玉  
札金文位爲紫虛元君南岳夫人比秩仙公夫人  
壇在南岳中峯之前巨石之上丹臺錄云魏天人  
爲紫虛元君治南岳真誥云上真司命南岳真人  
杜甫望南岳詩云恭聞魏夫人群仙夾翺翔真人  
陳興明修道於南岳元陽宮真人施存修道於石  
廩峰西真人徐靈期修道於衡岳上清宮作衡岳  
記敘洞府靈異仙人鄧郁之修道於衡岳紫蓋峯

石壇九仙宮郁之以丹財讓徐靈期上升郁之乏財志願不移臺司奏少微星現南楚長沙分野武帝訪知其故詔賜金帛子女命于南岳修內外二丹二年餘就石壇升天真人陳度修道於石廩峰玉觀今有陳真人煉丹臺誦經臺鬼裁石浴丹泉風穴雷泓諸遺跡真人張如珍修道於衡岳九真觀仙人張太空亦隱衡岳上清宮修道後移元陽宮仙人陳法明隱衡岳洞陽宮修道乃施真人伏鬼會真之所又按唐杜光庭五岳記東岳泰山岳

神天齊王領仙官玉女九萬人山週迴二千里在兗州奉符縣羅浮山括蒼山爲佐命蒙山東山爲佐理南岳衡山岳神司天王領仙官玉女三萬人山周迴二千里以霍山潛山爲儲副天台山句曲山爲佐理中岳嵩高山岳神中天王領仙官玉女一十二萬人爲五土之主山周迴一千里洛州告成縣少室山東京武當山爲佐命泰和山陸深山同佐理西岳華山岳神金天王領仙官玉女七萬人山周迴二千里在華州華陰縣地肺山女凡山

為佐命西岳山青城山峨眉山嶓冢戎山西玄吳  
 山同佐理北岳恒山岳神安天王領仙官玉女五  
 萬人山周迴二千里在鎮州河逢抱犢山為佐命  
 玄隴山崆峒山洛陽山為佐理三十六洞天按霍  
 童山霍林洞天三千里在福州寧德縣太山蓬玄  
 洞天一千里在兗州乾封縣衡山朱陵洞天七百  
 里在衡州衡山縣華山總真洞天三百里在西岳  
 常山總玄洞天一百里在北岳嵩山司真洞天三  
 千里在中岳峨眉山虛凌太妙洞天三百里在嘉  
 州峨眉縣廬山洞虛詠真洞天三百里在江州潯

陽縣九天使者四明山丹山赤水洞天一百八十  
 里在越州鄞縣劉樊得道會稽山極玄陽明洞天  
 三百里在越州會稽縣夏禹探書方白山德玄洞  
 天五百里在京兆藍屋縣太上所現壇西山天寶  
 極玄洞天三百里在洪州南昌縣洪崖所居大圍  
 山好生上元洞天三百里在潭州醴陵縣傅天師  
 所居石室仙壇潛山天柱司玄洞天一千三百里  
 在舒州桐城縣九天司命武夷山昇真化玄洞天

百二十里在建州建陽縣毛竹武夷君鬼谷山貴  
玄思真洞天七十里在信州貴溪縣華蓋山容城  
太玉洞天四千里在温州永嘉縣玉笥山太秀法  
樂洞天百二十里在吉州新淦縣蓋竹山長耀寶  
光洞天八十里在台州黃岩縣葛仙公所居都嵩  
山太上寶玄洞天八十里在容州白石山秀樂長  
真洞天七十里在容州北源勾漏山玉闕寶圭洞  
天三十里在容州有石室丹井九疑山湘州太虛  
洞天三十里在道州延唐縣洞陽山洞陽隱觀洞

天百五十里在潭州長沙縣幕阜山玄真太元洞  
天二百里在鄂州唐軍縣吳孟上昇處大酉山大  
酉華妙洞天一百里在辰州界金庭山金庭崇妙  
洞天三百里在越州剡縣褚伯玉沈休文居之麻  
姑山丹霞洞天一百五十里在撫州南城縣麻姑  
上昇仙都山仙都祈仙洞天三百里處州縉雲縣  
黃帝上昇青田山青田大鶴洞天四十里在處州  
青田縣葉天師居之天柱山大滌玄蓋洞天一百  
里在杭州餘杭縣天柱觀鍾山朱湖太生洞天一

百里在潤州上元縣良常山良常方會洞天三十  
里在茅山東北中茅君所居桃源山白馬玄光洞  
天七十里在朗州武陵縣金華山金華洞元洞天  
五十里在婺州金華縣有皇初平赤松觀紫蓋山  
紫玄洞盟洞天八十里在韶州曲江縣七十二福  
地按地肺山在茅山有紫陽觀乃許長史宅石磻  
源在台州黃巖縣嶠嶺東仙源在温州白溪南田  
在處州青田玉璠山在温州海中青嶼山在東海  
口崆峒山在夏州黃帝所到郁木坑在吉州玉笥  
山玉梁觀乃蕭子雲宅武當山在均州七十二洞  
君山在岳州青草湖中桂源在連州抱福山廖先  
生宅靈墟在台州天台山司馬天師居處沃州在  
越州剡縣天姥岑在台州天台南劉阮迷路處若  
耶溪在越州南樵風徑巫山在夔州大僊壇清遠  
山在婺州浦陽縣東白安山在交州安期先生居  
處馬嶺在郴州蘇耽上昇處鷲羊山在長沙縣許  
君斬蜃處洞真壇在長沙南岳祝融峰洞宮在長  
沙北洞靈源在衡州南岳招仙觀上峰陶山在溫

州安固縣貞白先生修藥處爛柯山在衢州信安  
縣龍虎山在信州貴溪縣天師宅勒溪在建州建  
陽縣靈應山在饒州北施真人宅白水源在龍州  
金精山在虔州虔化縣張女真修道處閭阜山在  
吉州新淦縣天師行化處始豐山在洪州豐城縣  
逍遙山在洪州連西山許真君修道處東白源在  
洪州新建縣鍾真人宅鉢池在荊州北王真人修  
道處論山在丹徒縣毛公壇在蘇州洞庭湖中包  
山七十二壇劉根先生修道處九華山在池州青  
陽縣竇真人上昇處桐栢山在唐州桐栢縣淮水  
上源平都山在忠州酆都縣陰君上昇處綠蘿山  
在常德武陵北章觀山在澧州澧陽縣抱犢山在  
潞州上黨莊周所居大面山在蜀州青城山羅真  
人所居虎溪在湖州安吉縣方真人修道處元晨  
山在江州都昌縣馬跡山在舒州王先生修洞淵  
法處德山在朗州武陵縣譚卷先生居古名枉山  
鷄籠山在和州歷陽縣玉峰在藍田縣商谷在商  
州上洛縣四皓所隱處陽羨山在常州宜興縣張



公洞常白山在兗州中條山在河中永樂縣侯真人上昇處霍山在壽州雲山在朗州武陵縣四明山在梨州魏徵上昇處緱氏山在洛州緱氏縣子晉上昇處臨邛山在邛州臨邛縣白鶴山相如所居少室山在河南府連中岳翠微山在西安府終南太一觀大隱山在明州慈谿縣天寶觀白鹿山在杭州天柱山吳天師所隱大若巖在温州永嘉縣貞白先生修真誥處嶧山在萊州嶗嶧山仙公會真處西白山在越州趙廣信上昇處天印山在昇州上元縣洞玄觀仙公行化處金城山在雲中郡三皇井在温州仙嵒山沃壤在海州東海縣三疎修道處又有十大洞天按第一王屋洞小有清虛天周迴萬里王褒所理在洛州王屋縣第二委羽洞大有虛明天周迴萬里司馬季主所理在武州第三四城洞太玄總真天周迴三千里王方平所理在蜀州第四西玄洞三玄極真天廣二千里裴君所理在金州第五青城洞寶仙九室天廣二千里甯真君所理在蜀州青城縣第六赤城洞上

玉清平天廣八百里王君所理在台州唐興縣第  
七羅浮洞朱明曜真天廣一千里葛洪所理在博  
羅縣屬修州第八句曲洞金壇華陽天廣百五十  
里茅君所理在潤州句容縣第九林屋洞左神幽  
墟天廣四百里龍威丈人所理在蘇州吳縣第十  
括蒼洞成德隱真天廣二百里平仲節所理在台  
州樂安縣自五岳洞天福地而外九州名山不列  
道書可以樓真者亦尚有之北京燕山有石經洞  
隋大業間法師靜琬居此募緣鑿石刻經一藏子

孫相傳歷唐至遼金始完藏洞者七藏穴者三洞  
閉以石門穴鎮以浮屠累代皆有碑碣玉田縣陽  
雍伯作義漿飲行者有人遺之石子云種此生好  
玉後種成雙白壁娶北平徐氏共仙去真定府恒  
山北岳已見五岳記唐僧一行姓張氏造大衍曆  
精天文有道術聖僧也嘗匿北斗七星以救王媪  
之子謚大慧禪師大名府魏縣人也王梵志生於  
林檎樹瘦中隋文帝時異人也黎陽人幽州上谷  
王次仲古神仙也始變篆籀之體爲隸書秦始皇

命使召之不至且殺之使者至山致命次仲化爲大鳥振翼而飛使者懼無以復命見殺鳥墮三羽使者得之以進今名落翮山在隆慶州嘯父薊州人在西周市上與人補履久而不老南都古名金陵又名秣陵又名石頭又名建業寶誌公與梁武帝住石頭一日寶誌與武帝食魚膾武帝曰朕不食此已多年上人何爲爾誌公吐之水皆活故金陵有膾殘魚又杯渡者神僧也嘗以杯渡水往來金陵鍾山仙洞卽道書三十一洞天石城洞在石頭西嶺下臨大江真誥云此中有洞天也石頭城南三里梁武帝時有雲光法師卽二祖慧可講經於岡阜感天雨花今名雨花臺牛首山有辟支佛足跡堯率崑文珠洞辟支洞辟支塔舍利時見放光牛首山南五里至西風嶺東行有石窟如屋有懶融和尚禪定於此有百鳥獻花之異今名獻花巖後遇四祖牛頭大師傳法石頭城西晉長興年中長沙城河陸地生青蓮兩朵官司掘得一瓦棺開見一僧形貌儼然其花從舌根頂顱出生父老

曰昔有一僧誦法華經萬餘部臨終葬以瓦棺今寺名瓦棺寺又有瓦棺閣靈谷寺有寶誌公石像太平興國寺誌公墓焉有道林真覺大師塔塔中銅鑄誌公像寶誌觀音大士化身也鍾山東有八功德水梁有胡僧曇隱寓錫於此乏水時有龐眉叟謂曰予山龍也猶之無難俄而一沼湧出清冽甘美句容縣東南四十五里有山形如句字初名句曲山後因三茅真君得道於此更名茅山道書爲第八洞天第一福地山有三峰真誥云金陵者

洞虛之膏腴句曲之地肺也古人謂爲金壇之虛臺天后之便闕清虛之東牕林屋之隔杳衆洞相通陰路所適七塗九源四方交達真洞仙館也註天后者林屋洞中之真君在太湖包山下龍威丈人所入得禹藏靈寶五符處也又曰是金陵之地肺也土良而井水甜美居其地必得度世又曰秦時名爲句金之壇以山生黃金也名曰金壇華陽之天又曰句曲洞天東通林屋北通岱宗西通峨眉山南通羅浮皆大道也句曲茅山北垂洞口一山

名良常山本亦句曲一山異名耳秦始皇出遊登  
句曲歎曰巡狩之樂莫過於山海自今以往良爲  
常也羣臣稱壽讚樂乃改句曲北垂曰良常之山  
良常從此得名大茅君諱盈字叔申中茅君諱固  
字季偉小茅君諱衷字思和三茅君兄弟修道成  
乘白鶴各治一峰故號三茅峯左元放齊戒三月  
登山得入華陽洞門見三茅真君授以神芝道經  
真人楊羲學道於茅山感上相青童君太虛真人  
赤君上宰西城王君大元茅真人清虛張真人桐  
栢王真人紫陽周真人中茅君小茅君苑中候荀  
中候紫光夫人南岳魏夫人右英王夫人紫微王  
夫人九華安妃靈照李夫人中候王夫人降授道  
要南岳魏夫人上昇過句曲茅叔申畱宴陶弘景  
止於句曲山自號華陽隱居後道成爲蓬萊都水  
監鳳陽府古鍾離國又名中都亳州苦縣乃老君  
誕生之地瀨鄉仁里曲渦水之陰也老君母無上  
元君爲益州洞仙李靈飛之配元君晝寢夢天開  
數丈衆仙捧日日墜爲五色珠吞之有娠八十一

年至商武丁九年元君攀李枝從左腋降生老君  
莊子生于蒙縣今蒙城縣是也莊子與惠子遊於  
濠梁之上莊子曰儵魚出遊從容是魚樂也今濠  
梁有觀魚臺藍采和嘗登鍾離市橋酒樓乘雲仙  
去漢淮南王安與賓客八公登山學仙道成共仙  
去鷄犬俱上昇故鷄鳴天上犬吠雲中也故此山  
號八公山在壽陽上有淮南王煉丹之所有珍珠  
泉咄泉人咄之則泉湧起降魔藏禪師卜壽州三  
峯山結茅野人化佛菩薩羅漢天仙或放神光師

不顧十年曰野人伎倆有窮老僧不見不聞無盡  
又李根得道隱壽春吳大文家談太尉王凌當敗  
語洩爲凌所搜捕不得凌果族誅根七百餘歲兩  
目瞳子皆方蘇州府古名姑蘇又名吳郡又名闔  
閭城太庭山在太湖中一名包山漢書云下有洞  
穴潛行水底無所不通號爲地脉貞行子一號寧  
貞子夏禹時命宛委之神玄夷使者授禹玉書靈  
寶五符治水真文後禹藏真文於太湖中洞庭山  
林屋洞天一名包山吳王闔閭登包山命仙人龍

威丈人入包山之洞見金城玉屋題曰天后別宮  
太陰之堂於玉屋几上得素書一卷闔閭不識其  
字使使問仲尼詐云赤雀銜書以授於王仲尼曰  
吾聞童謠云吳王出遊觀震湖龍威丈人名隱居  
北上包山入靈墟乃造洞庭竊禹書丘按謠言乃  
龍威丈人洞中得之赤雀所銜非丘所知也余觀  
左元放之入華陽洞龍威丈人之入包山洞可見  
洞府靈區至人有路得達特以俗物穢濁故無由  
自通耳湖上又有毛公壇或云毛萇修道於此虎

丘山有生公點頭石相傳生公說法石爲點頭故  
名又王方平麻姑嘗過吳門蔡經家又有穹窿山  
相傳赤松子食桂實石脂於此松江府古稱雲間  
又名五葺城王可交華亭人擢舟入江遇綵舫七  
仙人與之二粟食之成仙有靜安寺孫吳赤烏年  
中創寺刻碑今號赤烏碑雲間有船子德誠和尚  
得道於藥山禪師在華亭汎一小舟來往作偈數  
首略曰三十年來坐釣臺釣頭往往得黃能金鱗  
不遇空勞力收取絲綸歸去來有一魚兮偉莫裁

卷之三十一  
三十一  
渾融包納信奇哉能變化吐風雷下線何曾釣得  
來別人祇看採芙蓉兩岸暎一船紅何曾解染得  
虛空宋太平興國間有道人姓仰名德聰結廬於  
佘山之東峰有二虎大青小青爲侍天禧間跌坐  
而逝所葬石塔名聰道人塔常州府舊名句吳又  
名毗陵宋時劉混康有道術徽宗賜號葆真冲和  
先生宜興舊名陽羨有張公洞其門三面皆飛崖  
峭壁惟正北一門可入嵌空邃碧泉水散流石乳  
融結有燒香臺仙人房玄武石風土記漢天師張

道陵嘗修道於此又云唐白驢先生張果嘗棲隱  
於此又有善卷洞洞中寬廣可坐千人峭壁周圍  
刻爲佛像有石柱高丈餘號爲玉柱善卷古讓天  
下隱君子也鎮江府古稱京口潤州北固南徐朱  
方江心有金焦二山金山一名浮玉山唐有裴頭  
陀于此開山得金賜名金山宋高僧佛印嘗禪栖  
此山建妙高臺焦山以後漢焦先隱此得名上有  
摩崖石刻瘞鶴銘乃陶隱居筆也鶴林寺在京口  
玄素禪師居之揚州府古稱廣陵又名維揚又名



邗溝唐李珣廣陵人以陰德列名洞府金書節使李珣與同名夢而以爲已也乃有仙童云此相公江陽部民非相公也有瓊花觀紫陽真人張平叔嘗與一高僧同出神往揚州看瓊花通州狼山相傳山有白狼據焉以泗州佛法厭去之山上有僧伽大師殿又通州有呂四場呂純陽四度過之故名秦州古海陵地漢董永父以貧主人錢葬父爲傭奴以償天帝織女求爲妻一月而織纈三百疋以償所貸事畢凌雲而去此地今畱纈絲井宋有

海陵三仙徐神翁名守信爲天慶觀掃除人得道周恪唐甘弼與神翁同時得道淮安府古名淮陰又名山陽府城西有鉢池山乃王喬煉丹之處邳州卽古下邳黃石公坐圯橋上令張子房下而取履因授以素書今有黃石公畱侯祠僧伽大師於泗州信義坊建伽藍掘得古香積寺銘記并金像一軀大師嘗獨處一室頂有一穴恒以絮塞之夜則去絮香從頂出終于長安歸起塔臨淮號泗州大聖萬迴師曰僧伽大師觀音化身也廬州府巢

湖上有四峰特起如四鼎相傳魏伯陽煉丹此山丹成以白犬試之即僊去亦名四頂山有浮槎山相傳自海上浮來有梵僧過而指曰此耆闍一峰也梁武帝女為尼於此山建道林寺霍山在六安州南岳衡山之副也漢武帝南巡以衡山遠阻江漢乃移岳神於霍而祀焉又名天柱山左慈字元放廬江人入天柱山得道安慶府古名皖城又名龍舒潛山與霍山俱為南岳之副錫則子在商湯時於此山說長生經又崔文子於此山作赤丸黃散已人疲天柱山與潛山連其峰最高道書為司玄洞天司空山在太湖縣乃二祖慧可傳衣鉢與三祖僧璨之地山極高峻寧國府古名宛陵道書云天師吳筠尸解于宣城陵陽山乃凌陽子明得道處琴川在涇縣乃琴高控鯉遊處也池州府古名秋浦又名池陽青陽縣有九華山舊名九子山唐李白陋其名以山九峰如蓮花乃更名九華道士趙知微結廬於九華山中秋霖雨知微呼弟子登天柱峰玩月天色廓清皓月如晝月落方歸風

雨如初徽州府古稱新都又名新安郡城有問政山乃聶師道真人成道處唐許宣平歛人隱於城陽山南塢李白尋之不遇黃山有三十二峯二十四溪十八洞八岩第四峯有泉溫沸如湯常湧丹砂浴之能愈風疾世傳黃帝與容成公浮丘公合丹於此故有容城浮丘二山名白岳山在海陽有天門五老峰三姑峰天柱峰紫霄峰展旗峰駱駝峰獅子峰碧霄峰玉屏峰香爐峰鐘峰鼓峰樵源洞雨君洞桃花澗榭梅菴乃北方玄天上帝成道

之山也玄帝者淨樂國王之子國在海外西域炎帝時善勝后孕帝經十四月黃帝時產后左脇年十五辭王出家感紫虛元君授以無極上道且命曰子可越東海歷翼軫之野入一山擇衆峰之最高者曰紫霄峰下而居之凡身修煉了義大通玄一默含萬真洞會四十二年大得上道天花下雨仙樂自作帝拱立紫霄峰上五真群仙導其盛帝乃斂圭登羽蓋瓊輪朝赴天帝受北帝之靈符佩乾元之寶印後至商紂濁亂六魔爲殃帝斬馘

掃蕩乘符鎮極永治北方廣德州古名桐汭靈山  
上有文殊崑普賢臺羅漢洞蓋菩薩顯化處也和  
州鷄籠山道書爲第四十二福地徐州古彭城錢  
鏗得導引房中之術壽八百歲堯封之彭城中岳  
真人王玄甫太清真人彭宗俱彭城人浙江古吳  
越地杭州舊名虎林又名武林天竺峯有上中下  
三處葛仙翁於此得道又云寶雲山西爲葛嶺爲  
葛洪煉丹之所嶺上有葛仙翁墓洪字稚川晉人  
好道爲從祖葛玄弟子鄭思遠弟子又見仙人郭

文舉于大滌山中悟道結廬西湖修真著書號抱  
朴子飛來峰有西天僧慧理登此山歎曰此是中  
天竺國靈鷲山之小嶺不知何年飛來因號其峰  
曰飛來呼猿洞西天僧慧理畜白猿於靈隱寺呼  
之卽出月明長嘯清音滿室虎跑泉在杭之大慈  
山唐元和間性空大師來居慈山樂其山氣靈秀  
結菴其中尋以無水將他之有神人言曰自師之  
來我等徼惠甚大奈何棄去南岳童子泉當遣二  
虎移來果見二虎以爪跑山出泉甘冽勝常參寥

泉在西湖智果寺杭州守蘇軾與高僧參寥子汎湖汲泉鑽火烹黃蘗茶得名紫陽洞乃丁野鶴仙翁全真於此作詩云懶散六十三妙用無人識順逆兩皆忘虛空鎮常寂坐抱一膝而逝其妻王氏守素亦遂著道士服奉丁遺蛻二十年不下山得道今洞中野鶴真像儼然無恙孤山永福寺鳥窠道林禪師居之與靈隱寺叟光法師論法永明壽禪師在淨慈寺修禪又講西方淨土後一僧病故入冥見閻王禮拜永明禪師像甚勤以其生極樂

上品也大滌山在餘杭縣有日月分精金堂玉室仙官校災福之所姜真人主之與華陽林屋遂道暗通夾道中間一石若柱倒懸題石曰隔凡棲真洞在大滌山前西天柱嶺上大滌先桂琛語弟子何法仁曰汝宜居西洞可以遯世成真石室洞在大滌中峰前郭文舉真人登山採藥嘗洗藥於此又天師吳筠修煉於此天師旣尸解于宣城仍令門人藏書劍於此亦藏真蛻焉吳筠先入嵩山授道於潘師正唐明皇召見開陳人主多明教世務

天子重之沙門嫉其見遇高力士共浮屠短筠於  
帝遂求還山乃東入大滌了道白茅洞晉人遇一  
道士衣巾爽麗自洞中出詢所自來曰吾白茅先  
生職此久矣遂得名伏虎巖郭真君伏虎於此按  
晉書云葛洪何幼道借訪之目擊而已各無所言  
長嘯而退郭文舉先隱華陽石室丞相王導引至  
京師周顛問曰猛獸害人先生獨不畏邪曰我無  
害獸之心故獸不害我懇求還山導不許遁入臨  
安大滌洞晉許邁字遠遊亦栖隱於此山上今有

許邁升天壇及丹竈遺跡唐昭宗時仙人閻丘方  
遠居大滌洞錢鏐奏號玄同先生天柱山在餘杭  
縣四隅陡絕聳翠參天爲道家第五十七福地九  
仙山在臨安縣相傳葛洪許邁左元放王詡之流  
俱煉丹于此徑山乃道欽禪師所居道欽遇鶴林  
素禪師戒之曰汝乘流而行逢徑卽止師南行抵  
臨安徑山遂住錫焉天目山在臨安高三千九百  
丈周八百里山有兩峰峰頂各一池左右相對如  
目天目山與湖州府安吉縣界其山乃高峰和尚

開山內有高峰肉身元中峰和尚迷昧不通自誓  
獨立七日不悟當墜崖而死越七日忽覺性地開  
朗趙孟頫嘗師事之從遊說法甚衆方與衆立談  
忽雷雨大作條然長逝山有中峰塔院又有藏雲  
塔中峰悟道亭又有斷崖塔幻住菴立玉亭皆中  
峯遺跡也嘉興府古名檣李宋仙人馬自然徐彎  
俱鹽官人卽海鹽縣長水法師注楞嚴華嚴經示  
寂葬真如寺湖州府古名吳興又名霅川吳興東  
林沈東老好行陰德能釀八仙白酒一日有客自  
號曰道人楫曰知公白酒新熟願共一醉盡數斗  
不醉與東老論長生言未來事並驗因劈席上石  
榴皮題詩於壁云西隣已富云云乃洞賓也今吳  
興有回仙觀西塞山乃玄真子張志和居處乘舟  
往來若雪間爲浮家汎宅與顏真卿甚善一日水  
上爲水戲其詩曰西塞山前白鷺飛桃花流水鱖  
魚肥青箬笠綠蓑衣斜風細雨不須歸文子卽計  
然隱吳興餘英禹山今有計籌山於此昇仙唐封  
通玄真人

鴻苞集卷之三十二

瓊笈考下

明東海屠 隆  
西吳茅元儀公選訂  
從孫屠充符泠玄校

嚴州古名睦州唐施肩吾字希聖登進士第不仕  
自嚴陵入西山入道遇呂祖授金液還丹山有芭  
蕉源嚴陵瀨子陵釣臺桐君采藥于桐廬縣山結  
廬于桐下人問其姓名自號桐君今有桐君山金



華府古云金星與婺女爭華故名又古稱婺州金華山皇初平牧羊爲道士將入此山道成四十餘年不歸兄初起尋得之問羊何在初平叱白石皆起成羊萬頭初起知弟成仙遂捨妻子畱其服松脂茯苓至五萬日坐在立亾日中無影顏若童子之色初平後改號赤松子金華洞道經稱爲三十六洞天梁劉孝標棄官隱其中仙華山在浦江縣一名仙姑山又名少女峰世傳黃帝少女於此上昇仙人馬自然在永康縣延貞觀指庭松曰此松

已三千年矣當化爲石至夕大風雨其松果化近觀山中松皆化爲石今有松化石存焉孫遊嶽東陽人宋時遇簡寂先生陸靜修授以三洞經法茹芝却粒羽化授弟子陶弘景衢州府古名信安爛柯山晉樵人王質伐木入山見二童子對弈置斧於坐而觀童子與質一物如棗核食之不飢局終童子曰如斧柯爛矣質歸鄉里已及百年無復舊時人矣仙人酆去奢龍游崇仙宮道士得天師佩劍於石下處州府古名括蒼仙都山在縉雲又名

縉雲山黃帝煉丹于此時有非紅非紫之雲見是  
曰縉雲故名青田縣有青田大鶴洞天乃葉天師  
居之卽葉法善也法善括蒼人羊愔隱括蒼山得  
餌青蓮芝成道杜光庭唐仙人縉雲人紹興府古  
稱山陰又稱會稽會稽山初名茅山禹巡天下還  
大越登茆山以朝四方羣臣執玉帛來朝者萬國  
防風氏後至禹戮之乃大會計治國之道更名茅  
山曰會稽嚴青得服石髓法仙去介象得度世禁  
氣之術吳孫權時得道俱會稽人西廟之西曰中

峯下有禹寺寺之後相傳爲禹陵陵有禹井有菲  
泉山之東北接觀嶺其上有磐石曰降仙臺下有  
茗塢淘沙徑山南曰茅現一名玉笥其別峰曰石  
傘曰香爐西北五里與宛委山相接宛委山上有  
石匱壁立中有孔穴號陽明洞夏禹發之得赤珪  
如日碧珪如月又於中得金簡玉字之書悟百川  
之理乃黃帝先以靈寶五符真文書而藏之此山  
也又射的山有石室云是仙人射堂東高崑有射  
的石還望的的如射侯形圓如鏡天姥山在新昌

縣東接天台赤城登此山者或聞天姥歌謠之聲  
道書爲第十六福地沃洲山在新昌縣與天姥對  
峙道書爲第十五福地晉高僧支遁字道林嘗居  
此山與王謝諸公遊有養馬坡放鶴亭漢魏伯陽  
號雲牙上虞人入上虞山作神丹試白犬服之成  
仙作參同契寧波府四明山高一萬八千丈周二  
百一十里峰凡二百八十有二迴合巒聳山正中  
曰杖錫寺石上刻四大字曰四明山心相傳葛稚  
川筆也右有石牕四面玲瓏如戶牖通日月星辰  
之光又名四牕四明山心稍北曰潺湲洞洞之下  
曰過雲巖雲縹緲不絕者二十里人經行雲中故  
曰過雲南曰雲南北曰雲北天師劉綱與妻樊夫  
人同修道此山夫妻將昇天綱仕上虞令縣廳前  
一大皂角樹綱昇樹數丈方能飛舉夫人平坐冉  
冉如雲氣之昇同昇天而去今四明山上有樊榭  
丹竈遺跡存焉賀知章爲禮部侍郎秘書監夢遊  
帝居遂請於唐玄宗爲道士詔賜鑑湖一曲捨宅  
爲千秋觀後修真得道今鑑湖上有賀監祠大梅

山在府城西梅真子隱此山石洞仙井藥爐丹竈  
猶存又有真人陶凱於四明得道阿育王山釋迦  
文佛滅度闍維得舍利八斛四斗阿育王者以神  
力藏如來舍利於天下凡八萬四千塔闍浮提中  
計十有九處明州鄞縣塔之舍利蓋自劉惠達者  
入冥府令其往明州舍利塔懺悔惠達至無舍利  
塔拜禱數日忽聞地中有鍾鼓之聲拜愈誠懇地  
中忽湧出浮屠舍利劉惠達一云劉薩訶晉太康  
中并州人四明句章城中有啞女乃維衛佛化身  
也奉化有布袋和尚乃彌勒化身也普陀落伽山  
在海中又名小白華山又名梅岑山有潮音洞磐  
陀石乃觀音菩薩道場明州舊號三佛地謂維衛  
彌勒觀音也雪竇寺僧智覺錢俶王時著宗鏡錄  
一百卷金莪山呂純陽曾訪寺禪師不在顧方丈  
蕭然頃有童子出呂問此何寥寥曰莫道寥寥虛  
空也呂佳其對題詩於壁云方丈有門出不鑰見  
個山童雙露腳問伊方丈何寂寥道是虛空也不  
著台州府古名赤城蓋竹山有竹如蓋故以爲名

中有洞名曰長耀寶光之天天台山上應台宿有  
石橋石橋以裏神界仙都夙絕幽閔有瓊樓玉闕  
天堂碧林醴酒仙飯天台桐栢王子晉號桐栢真  
人以此唐應夷節隱桐栢觀修正一上清法授杜  
光庭光庭夢帝命作岷峨主司遂跌坐而化唐司  
馬承禎隱桐栢山號白雲子唐睿宗召見講治身  
治國之術見李太白曰此子可與神遊八極之表  
紫陽真人張用成字平叔遇劉海蟾得金丹術得  
道作悟真篇台州人也麻姑巖麻姑訪王方平於

此上有洞麻姑像存焉隱身巖有國清寺智顛大  
師居此作止觀論唐貞觀中豐干禪師謂太守問  
丘胤曰寒山拾得卽文殊普賢後身也問丘至卽  
訪之二人笑曰豐干饒舌隱身入巖中巖卽隨合  
玉京洞在赤城山晉許遠遊嘗居此與王右軍書  
云自山陰至臨海多有金庭玉堂仙人芝草謂此  
太清真人彭宗字法先周穆王時蒙杜冲真人授  
丹經五千文守一之道宗寶而修之日臻幽妙受  
書爲太清真人治赤城宮丹霞洞乃葛孝先仙公

煉丹處桃源洞漢永平中劉晨阮肇入山採藥遇  
二仙女卽此括蒼洞在仙居縣名曰成德隱元之  
天按括蒼洞在台州仙居縣其實處州乃古括蒼  
地也温州府古名東甌吹臺山在府城南王子晉  
吹笙處華蓋山有容成洞名容成太玉之天仙崑  
山在瑞安縣大羅山之陽亦有三皇井黃帝池爲  
道書第二十六福地宋真宗時闕元觀羽士張無  
夢見真宗講謙卦徽宗時林靈素號金門羽客俱  
永嘉人鴈蕩龍湫在樂清縣景最深秀赤水山由

鄞縣抵樂清縣山水色赤故名朱孺子三國時師  
仙人王玄真斲枸杞根類花犬煮食之仙去江西  
古豫章地南昌府西山有仙洞道書第十二天寶  
極玄洞天卽此乃洪崖仙人乘鸞之所唐陳陶隱  
此山修道嚴宇牧豫章以陶操行高潔欲撓之遣  
小妓蓮花往侍焉陶殊不采妓乃獻詩求去後人  
移作陳圖南事非也野狐巖在百丈山後懷誨禪  
師開堂有老人聽說法而去悟得超脫乃一老狐  
斃於山下矣洪崖山在西山旁乃洪崖先生得道

處豫章又名洪州以此洪崖者或云卽黃帝之臣  
伶倫也李八百洞在奉新縣仙人李八百歷夏商  
周年八百歲又動則行八百里故時人號爲李八  
百度唐公房公房舉家飲李八百仙酒拔宅飛昇  
八百於漢州金堂縣三學山白日飛昇不知何時  
來居此洞又云卜居於高安之五龍岡西山之陽  
逍遙山金氏宅乃許旌陽真君修煉之地旌陽名  
遜字敬之南昌人句曲山遠遊君邁護軍長史穆  
皆真君再從昆弟也爲蜀郡旌陽令有神明之政  
授道於黃堂誥姆傳孝悌王金丹寶經銅符鐵券  
正一斬邪之法三五飛步之術以神劍斬蛟除害  
豫章得免爲魚真君功在萬世也真君旣斬蛟謂  
贛江百怪叢居慮爲後害乃鑄鐵柱二十在于城  
南縻以鐵索直繞出長江以鎮蜃穴設讖云此後  
一千二百四十餘年當有八百地仙出世以沙龍  
之生塞爲驗弟子數百人却之不可化炭爲美婦  
人以試之不爲污染十人而已其餘多自愧而去  
真君功德旣高上帝詔爲九州都仙太史高明大

使司玄枵之野總領仙籍賜紫綵羽袍瓊旌寶節  
玉膏金丹仙眷四十二口拔宅飛昇鷄犬亦隨有  
僕許大令與其妻市米西領奔歸不及車翻遺米  
於地真君奉蜀錦質信於謚姆謚姆制以爲殿帷  
至是忽飛來故宅之上故後置觀名爲遊帷觀後  
宋真宗改曰玉隆觀又有鐵柱宮章江西岸有龍  
沙建昌縣西津有炭市寧縣東有磨劔池延貞觀  
有鎮蛟石西嶺名翻車嶺有生米鎮旌陽弟子吳  
猛亦於此隨真君上昇有女吳彩鸞於西山遇文

簫姝焉又弟子施岑甘戰皆從真君上昇饒州府  
馬跡山晉仙人王遙煉丹其上有禮斗壇煉丹井  
石藥孟遺跡王遙字伯遼祛邪治病有妻無子仙  
去後人猶見之此山廣信府鬼谷山在貴溪縣世  
傳蘇秦張儀師鬼谷子於此龍虎山在貴溪縣漢  
天師張道陵修煉於此道陵字輔漢修煉九鼎神  
丹在鶴鳴山感老君下降命天師攝邪歸正分別  
人鬼蕩六天魔王授以正一盟威秘籙天師奉行  
正一之化攝二萬六千種外道惡魔誅絕邪僞百



姓翕然奉以爲師又嘗栖止雲臺山閣皂山太山  
遣使持玉冊授正一真人之號以盟威都功等諸  
品秘籙斬邪二劔玉冊玉印授其長子衡世世不  
替天師又號虛靜天師南康府匡廬山周武王時  
匡續字君平師柱下史老聃得道結茆於南嶂山  
虎溪之上仙去之後周威烈王使使召之使者訪  
其所隱空存靖廬使回奏以南嶂山爲靖廬山邦  
人呼曰匡山又曰匡阜又曰匡廬山虎溪之名亦  
至今不改楚康王懷王之後始皇滅六國康王奔  
廬山得道今山中有康王谷後晉有慧遠法師居  
廬山之東林修西方淨土教士大夫多從之遊名  
白蓮社陶潛亦請入社後以無酒攢眉而去鐵柱  
峰在廬山許旌陽與吳世雲乘鐵船二龍挾行戒  
舟人瞑目勿視至紫霄峰茂林戛擊有聲舟人竊  
視之龍卽委去船墮於此虎溪在廬山下而屬彭  
澤縣慧遠送客不過虎溪過則虎輒鳴號後送陶  
潛陸靜修共話不覺過虎溪三人大笑後人卽此  
建三笑亭又有破頭山乃五祖弘忍大師事四祖

道信大師爲栽松道者後以年老轉託浣衣女子  
再生傳法建昌府麻姑山三十六洞天之一乃麻  
姑成道處有麻姑壇唐顏真卿作記麻姑與王方  
平同降吳門蔡經家南豐縣紫霄觀後有壺公巖  
相傳壺公於此得道乃費長房之師也臨江府閣  
皂山乃神仙之館漢張道陵晉丁令威葛孝仙皆  
嘗修煉於此有凌雲峰漱玉泉投龍潭磨劍池會  
仙橋著衣臺煉丹壇仙人石諸勝蹟玉笥山在新  
淦縣名太秀法樂洞天本名羣玉山漢武帝於山  
頂立降真壇日夕祈禱天乃降白玉笥於壇上武  
帝遣使取之飄風捲玉笥而去因封爲玉笥山又  
天降白玉梁成觀故有玉梁觀蕭子雲居之觀之  
東北有洞曰郁木坑子雲移居於此唐大曆初道  
士謝通修入此山得遇蕭子雲梅福賜嘉禾五穗  
松葉半斤令頓服之後竟仙去又有仙人正元芝  
亦得道於玉笥山郁木坑仙人孔明丘駱法通吳  
天印張法樞謝志空周仙用鄒武君謝幽巖楊元  
中何紫霄輩十三人避秦二世亂同隱於玉笥山

遇洞天司命北鄂落籍南宮鏤名遂授還丹之秘  
得道先是一日有老人持一盆小鯉魚十枚蓄于  
洞天後池後九人道成玉帝勅召九龍控馭乃先  
所養之魚也九人仙去獨何紫霄遠遊不同九人  
畱玉冊霞衣在飛仙石上以遺之紫霄後爲地仙  
吉安府泰和縣玉山晉永嘉中有王子瑤修煉於  
此道成仙去唐名此山爲玉山唐貞觀中又有匡  
智者與侄大郎修道於此山上有三壇上壇王子  
瑤中壇匡智下壇匡大郎瑞州府新昌縣黃蘗山  
有黃蘗禪師於此得道黃仁覽居瑞州府從許真  
君得道明香真人李八百之妹修道於華林山元  
秀峰冲舉玄秀真人王母第九子於此山成道袁  
州府萍鄉縣有洪陽洞乃葛洪婁陽二仙所居故  
名贛州府寧都縣有金精山漢張金華女麗英生  
稟瑞相年十五入山得道長沙王吳芮欲聘之麗  
英乘紫雲昇于半空語曰吾乃金星之精降治此  
山言訖而去因以名山福建古名七閩建寧府崇  
安縣武夷山彭祖有子二人長名武次名夷其所

隱山名曰武夷山又云混沌初開有神曰聖姥母子二人居占此山後衆仙立爲大姥聖母令人祝廟稱太元夫人是也又云天台山元靈老君華真人號爲控鶴仙人是也又云昔有魏王名子騫於此山得道有白石先生馬鳴先生等八人并女子四人共十二人同詣此山謁魏王爲地主求道得遇控鶴仙人各賜胡麻一合湯藥半合得道玄化又云秦始皇時武夷君置葢酒會鄉人幔亭峰上約男女千餘人齋戒如期而往乃見虹梁跨溪飛梯四級至亭有幔亭綵屋金鳳翠旄設東西地席施綠油紅卷花食卓當中設一虛牀謂之太極玉皇座西設一虛牀謂之大姥魏真座東設一虛牀謂之武夷君座悉施紅雲茵紫霞褥空中呼鄉人爲曾孫讚告男女孫分東西入就座太極玉皇大姥魏真武夷君以次降臨又聞讚告命群仙作樂酒味甘香而醇百味珍奇而殊越酒罷又聞讚告速下山俄而風雨暴至各回顧山頂無復一物嗚

呼下土凡民穢質得與上真靈人共宴萬劫至幸矣真靈所以不惜昭顯炫赫者政以聳動群愚興起道念如許太史拔宅飛昇遍別鄉里親故瓊旌寶節玉膏金丹飛劍遊帷降使傳詔仙童綵女紅霞紫雲可謂煜霄靈明非復弢光晦迹嗟乎道欲其晦迹欲其章蓋玄聖有深意存焉不欲令後人疑爲荒唐杳冥而不信也而今之人猶然疑爲荒唐杳冥而不信則亦無如之何矣按武夷山有三十六峰大王峰一方亭峰昇真洞玉女峰昇仙峰試劍石仙船巖金鵝洞接筭峰天遊峰又有九曲南中諸山之最勝者也白玉蟾瓊州人修真於武夷山政和縣有洞宮山其山重疊九峰狀如蓮花又謂之九蓮峰古有魏虞二真人于此修煉丹成上昇因號魏虞洞天泉州府晉江縣有紫帽山山有金粟洞東有凌霄塔西有石鼓丹爐試劍棋局仙掌諸峰唐元德真人鄭文叔居之時泉人有客洛陽者邂逅一羽衣寄書與文叔歸而授書文叔遺以粟米半升還家視之金粟也宋寧宗御書金粟

之洞四字刻石山中興化府仙遊縣漢時有何氏兄弟九人飲山上飛泉因而得道上昇俗呼何巖下爲何嶺又云何氏兄弟九人煉丹此山丹成各乘一鯉仙去故號山下湖曰仙湖俗名九鯉湖湖之右有九仙宮近世人多就而祈夢往往靈驗福寧州有洪山相傳葛洪至此煉丹福州府寧德縣霍童山道書爲霍林洞天爲三十六洞天之首昔吳郡鄧元沛國王元甫監官褚白玉於此授青精飯白霞丹景之法改名仙遊山唐司馬承禎於此

修煉駕鶴飛昇故又名鶴林又有高蓋山此山之別峰也徐真君於此上昇徐本牧牛兒飯牛山椒聞天樂聲出林杪遂遇異人授燒煉訣有趙真君遠訪之以所得秘密與之參契徐丹成與兄弟姊妹七人餌之同時上昇故其地有七仙亭邵武府龍湖普聞禪師唐僖宗太子也出家叅石霜居邵武山後因救龍行雨罪死龍報恩山下爲泉號曰龍湖因號龍湖禪師汀州府連城縣有滴水巖舊傳定光佛住錫於此漳浦縣有梁山山有蓮花峰

葛稚川嘗居之河南古各東都又名大梁又名洛陽古豫州地也開封府首山在襄城縣黃帝嘗遊此山採首山之銅以鑄九鼎卽此黃帝至襄城之野七聖俱迷問牧馬童子卽此襄城也具茨山在新鄭縣黃帝登具茨山見大隗君又見黃蓋童子卽此彰德府林縣黃華山卽林慮山有栖霞谷橋順二子琮璋隱於栖霞谷清虛服氣餌飛龍藥得道鮑靚陳留人別見李根許昌人別見郭上竈以滌器役於汴州橋茶肆呂祖度之神秀大師尉氏人五祖弟子爲北宗祖師衛輝府蘇門山在輝縣晉孫登隱此號蘇門先生阮籍往見之與論黃農玄寂及商略終古嘿然不應意盡長嘯而退至半山聞嘯聲若鸞鳳又如數部鼓吹乃登嘯也今其上有一嘯臺下有百泉登字公和河南府偃師縣緱氏山乃王子晉登仙之所登封縣有嵩山五岳之中岳已見前五岳記中獨嵩岳元珪禪師事尚遺故補記之按禪師伊闕人姓李氏幼歲出家唐永淳二年受其戒隸閑居寺習毗尼無懈後謁安國

師頓悟玄旨遂卜廬於岳之龐塢一日有異人袞

冠袴褶

徒顛反

而至從者極多輕步舒徐稱謁大師

師覩其形貌竒偉非常乃諭之曰善來仁者胡爲  
而至彼曰師寧識我邪師曰吾觀佛與衆生等吾  
一目之豈分別耶彼曰我此岳神也能生死於人  
師安得一目我哉師曰吾本不生汝焉能死吾視  
身與空等視吾與汝等汝能壞空與汝乎苟能壞  
空及汝吾則不生不滅也汝尚不能如是又焉能  
生死吾耶神稽首曰我亦聰明正直於餘神詎知  
師有廣大之智辯乎願授以正戒令我度世師曰  
汝旣乞戒卽旣戒也所以者何戒外無戒又何戒  
哉神曰此理也我聞茫昧止求師戒我身爲門弟  
子師卽爲張座秉爐正几曰付汝五戒若能舉持  
卽應曰能不能卽曰否曰謹受教師曰汝能不姪  
乎曰我亦娶也師曰非謂此也謂無羅欲也曰能  
師曰汝能不盜乎曰何乏我也焉有盜取哉師曰  
非謂此也謂饗而福淫不供而禍善也曰能師曰  
汝能不殺乎曰實司其柄焉曰不殺曰非謂此也



謂有濫誤疑混也曰能師曰汝能不妄乎曰我正  
直焉有妄乎師曰非謂此也謂先後不合天心也  
曰能師曰汝不遭酒敗乎曰能師曰如上是有爲佛  
戒也又言以有心奉持而無心拘執以有心爲物  
而無心想身能如是則先天地生不爲精後天地  
死不爲老終日變化而不爲動畢盡寂默而不爲  
休信此則雖娶非妻也雖饗非取也雖柄非權也  
雖作非故也雖醉非昏也若能無心於萬物則羅  
欲不爲淫福淫禍善不爲盜濫誤疑混不爲殺先

後違天不爲妄憍荒顛倒不爲醉是謂無心也無  
心則無戒無戒則無心無佛無衆生無汝及無我  
孰爲戒哉神曰我神通亞佛師曰汝神通十句五  
能五不能佛則十句七能三不能神悚然避席跪  
啓曰可得聞乎師曰汝能戾上帝東天行而西七  
曜乎曰不能師曰汝能奪地祇融五岳而結四海  
乎曰不能師曰是謂五不能也佛能空一切相成  
萬法智而不能卽滅定業佛能知羣有性窮億劫  
事而不能化道無緣佛能度無量有情而不能盡

衆生界是爲三不能也定業亦不牢久無緣亦是  
一期衆生界本無增減且無一人能主其法有法  
無主是謂無法無法無主是謂無心如我解佛亦  
無神通也但能以無心通達一切法爾神曰我誠  
淺昧未聞空義師所授戒我當奉行今願報慈德  
效我所能師曰吾觀身無物觀法無常塊然更有  
何欲耶神曰師必命我爲世間事展我小神功使  
已發心初發心未發心不信心必信心五等人目  
我神踪知有佛有神有能有不能有自然有非自  
然者師曰無爲是無爲是神曰佛亦使神護法師  
寧墮叛佛耶願隨意垂誨師不得已而言曰東巖  
寺之障莽然無樹北岫有之而背非屏擁汝能移  
北樹於東嶺乎神曰已聞命矣然昏夜必有喧動  
願師無駭卽作禮辭去師門送而且觀之見儀衛  
逶迤如王者之狀嵐靄煙霞紛綸間錯幢幡環珮  
凌空隱沒焉其夕果有暴風吼雷奔雲掣電棟宇  
搖蕩宿鳥聲喧師謂衆曰無怖無怖神與我契矣  
詰旦和霽則北嶺松栝盡移東嶺森然行植師謂

其徒曰吾沒後無令外知若爲口實人將妖我以  
開元四年丙辰歲囑門人曰吾始居寺東嶺吾滅  
汝必寘吾骸於彼言訖若委蛻焉余因元珪論禪  
而與人發明此一段大事或問余曰師言不生不  
滅吾亦見師生亦見師歿何爲不生不滅曰吾身  
生理不生吾身滅理不滅曰何爲理不生何爲理  
不滅曰理先天地天地生理非始生理後天地天  
地滅理不俱滅周宣王時真人宋倫洛陽人祝鷄  
翁洛陽居尸鄉人東漢人薊子訓至洛陽能分形  
以會公卿明崇儼洛州人爲唐高宗六月取雪南  
陽府汝州有崆峒山廣成子隱此黃帝就而問道  
焉曰至道之精杳杳冥冥至道之極昏昏默默黃  
帝由崆峒遊襄城登具茨訪大隗皆與此山接上  
有廣成廟崆峒觀又云在陝西平涼府古涇原地  
考之終以此處爲是陰長生真人新野人天台司  
馮子徽懷慶府溫縣人王屋山在懷慶府濟源縣  
西百里接山西絳州絳縣禹貢曰底柱析城至於  
王屋是也王屋山形如王者車蓋故名又曰山空

其中列仙宅之其內廣濶如王者之宮也黃帝陟  
王屋山開石函發玉笈得九鼎神丹注訣大極真  
人杜冲周昭王時真人展先生降而授道冲身生  
玉英五臟堅潤授書爲太極真人下任王屋山仙  
王按龜山白玉上經暨茅君內傳云大天之內有  
玄中洞三十六第一曰王屋之洞周迴萬里名清  
虛小有之天王褒所理褒爲清虛小有天王又唐  
大曆中王夔爲小有洞真人又張平叔化後與劉  
奉真相見於王屋山山之絕頂有天壇乃仙靈朝  
會之所山麓有陽臺宮乃司馬承禎修真之所有  
寥陽殿有白雲道院八仙嶺有仙猫洞燕真人丹  
成鷄犬皆仙去而猫獨不得飛昇至今在洞呼之  
卽應陽臺宮東北有煙蘿子祠煙蘿子于此得道  
從此上有紫微宮天王殿三清殿通明殿紫微宮  
西有望仙坡乃披雲子修煉之處費長房汝南人  
許旌陽汝南人今汝寧府山東古齊魯地泰安州  
東岳泰山已見五岳記安期生瑯琊阜鄉人秦始  
皇召見賜金壁千萬出阜鄉亭悉置去以赤玉舄

一輛爲報日後千年求我蓬萊山下王方平東海人今屬兗州府吳猛字世雲東昌府濮陽人馬明生青州府臨淄人登州府福山縣之罘山秦始皇登山命李斯刻石紀功文登縣有煙霞洞咸陽王重陽祖師諱嘉遇呂純陽授以修真口訣得道和光混俗人呼爲王害風以緣在東方出關抵登州文登縣謂人曰我嘗修煉此山煙霞洞中盍往觀焉人曰我等世居此未聞有洞相與鑿之果有洞洞口大書煙霞二字器具之朽者與玉池井尚在

重陽度七真寧海馬丹陽及其妻孫仙姑不二譚長真王玉陽郝太古東萊劉長生栖霞丘長春竝成真人全真之教大行卽墨縣勞山山高峻絕登陟爲勞故名秦始皇登此山望海外蓬萊三島神仙記云樂子長遇仙於勞山又吳王夫差嘗東遊登此山得靈寶度人經穀城山在東阿縣張良受黃石公素書云山下黃石卽我也遼東丁令威成仙化鶴來歸今有華表山陝西古名關中又名咸陽函關乃關尹喜候老子授道德經處秦始皇時

仙人茅濛字初成鍾離權字雲房漢成帝時劉根  
俱咸陽人西安府終南山太乙山一山而兩名太  
乙山一名地肺三秦記曰太乙在驪山西去長安  
二百里中有石室靈芝常有一道士不食五穀自  
言是太乙之精人齋潔乃得見之東華帝君王玄  
甫于終南山凝陽洞以道授鍾離公鍾離公挈呂  
洞賓入終南山鶴頂授道有鍾離傳道集行於世  
唐圭峰禪師隱終南山與裴休溫造諸公講道長  
安昆明池西域胡僧請於池結壇祈雨七日縮水  
數尺有老人夜詣宣律師求救曰弟子乃昆明池  
龍也胡僧欺天求雨利吾腦命在朝夕宣曰貧道  
持律而已可求孫先生老人復詣孫思邈曰我聞  
昆明池有仙方若傳吾救汝龍曰此方上帝不許  
妄傳今急固無吝俄頃奉方而至孫曰汝還無盧  
胡僧池水漲溢如故胡僧羞恚而死王維輞川別  
業在藍田縣有孟城坳華子岡茱萸泝辛夷塢木  
蘭砦諸勝右丞深於禪理龍首山乃秦漢隋唐建  
都之處臨潼縣驪山唐李筌遇神姥於此爲授陰

符經之義蓋屋縣有方白山名德玄洞天老君于此行化爲三十六洞天之一河上公授漢文帝道德經在邠州北今有望仙臺存焉藍田縣秦嶺唐韓愈貶潮陽過此困雪遇韓湘仙子商州商山漢四皓隱此作采芝歌渭南縣倒獸山晉王嘉字子年隱于東陽谷鑿崖穴而居石季龍兵亂乃遷于倒獸山子年已得道作拾遺記華陰縣華山已見五岳記鳳翔府仙人馬成子扶風人入蜀鵠鳴山成道郿縣太白山鍾西方金宿之秀有達磨洞世傳達磨亦嘗與神光和尚傳法于此漢中府仙人唐公房一云公昉城固縣人飲李八百仙酒舉家仙去鞏昌府古名隴西天水兩當縣有鸞鷲山登真洞乃張果先生登真之所文始真人尹喜仙人山圖青牛道士封衡俱隴西人臨洮府渭源縣烏鼠山有仙靈之蹟臨洮古名金城高僧玄暘寶誌俱金城人平涼府涇州有涇陽洞庭龍女嫁涇陽君子棄在水濱牧羊柳毅過而託寄書洞庭卽此又孫思邈亦嘗被召入涇陽水府山西古名太原

晉地也太原府五臺縣五臺山五峯高出雲表頂  
皆積土平行因謂之臺文殊師利道場又名清涼  
山冬夏常冰雲東華帝君王玄甫得老子之道由  
崑崙山移居五臺山紫府洞天多禪林佛寺四方  
僧徒如雲絳州絳縣太行山極高西北諸山多其  
肢脉又連澤州亦是太行山連河南懷慶府亦是  
太行山平陽縣中條山在蒲州東南一十五里有  
桃花洞玄女洞張果隱中條山又唐仙人侯道華  
亦居中條山有王官谷唐司空圖字表聖棄官隱  
此名其亭曰休休自號爲耐辱居士崖柱峰在平  
陸縣黃河中流其形如柱有三門旁有老君爐世  
傳老子煉丹于此漢王喬河東人爲葉令飛鳧朔  
旦朝帝呂洞賓蒲州永樂縣人道書福地記云抱  
犢山在上黨東南與河南盧氏縣界玉匱云抱犢  
山東去恒山之南數百里趙翟字子榮上黨人也  
以懶病爲家人棄之山中遇神人哀而以松脂五  
升賜之服之疾愈身體輕強在民間三百餘年顏  
如童子入抱犢山仙去汾州介山在介休縣地名



綿上介子推不受祿與母偕隱其實仙去也今神仙傳有之湖廣楚地武昌府黃鵠磯紫荆山俱有呂祖仙迹羅公遠鄂州人襄陽府磨針澗在太白山北真武修煉久之未契玄元亟欲出山至此澗忽遇老嫗操鐵杵磨石上問磨此何爲嫗曰欲爲針耳曰不亦難乎嫗曰功至自成真武大悟卽返巖精修卒得上道嗚呼真武夙稟上聖之姿積功累劫之上猶必感悟磨針復持精力然後深入真契證聖超凡何況我輩下根方爲而輒望其成稍

遲而卽墮其志何由而精進乎于此可痛省矣黃州府黃梅縣有五祖山一名東山五祖弘忍大師者蘄州黃梅人也一智者見之歎曰此子缺七種相不逮如來後傳衣鉢與嶺南盧能是爲六祖四祖山亦在黃梅縣西北卽四祖大醫禪師道場荊州府當陽縣當陽山乃神秀禪師栖止五祖弟子是爲北宗紫蓋山道書爲第三十二洞天梁陸法和隱於江陵百里洲有道術平侯景入道岳州府君山在洞庭湖中堯女湘君湘夫人嘗居此故名

又云黃帝煉丹於鼎湖中之君山白日乘龍上昇  
故號君山鼎湖卽洞庭湖也上有黃陵廟洞庭南  
連青草西亘赤沙七百里君山則洞庭孤絕處也  
君山一名洞庭山又名湘山旁有柳毅井傳書亭  
酒香山湘川記君山有美酒飲者不死漢武帝得  
之爲東方朔竊飲此也又柳毅過涇陽爲洞庭龍  
女寄書與洞庭君後龍女遂嫁毅毅亦爲神洞庭  
故此處有柳毅祠又呂洞賓多遊湘潭岳鄂之間  
嘗題詩岳陽樓云朝遊碧海云云太浮山在澧州

有石室青玉壇丹竈白鹿池十八洞相傳浮丘子  
學道浴丹之所長沙府洞陽山在瀏陽縣道書爲  
第二十四洞天唐孫思邈煉丹於此鷺羊山在府  
城北二十里道書爲七十二福地之一乃成少卿  
昇仙之所有仙壇丹臺在焉衡山緱仙姑長沙人  
受度南岳魏夫人成道小瀉山在醴陵縣卽道書  
第十三洞天也章仙山在醴陵縣道書七十二福  
地之一世傳臧真人得道之所又大圍山好生上  
元洞天在醴陵縣傳天師所居衡州府衡山縣衡

山南岳已見五岳記常德府桃源縣綠蘿山乃道書爲七十二福地晉太康中武陵人捕魚爲業緣溪行忽逢桃花林夾岸林盡水源便得一山捨船從山口入初極狹纔通人復行數十步忽然開朗土地平曠屋舍儼然有良田美池桑竹之屬其中往來種作男女怡然自樂見漁人乃大驚便要設酒作食自云先世避秦時亂率妻子來此不復出遂與外人間隔問今是何世乃不知有漢何論魏晉此中人語云不可爲外人道也漁人出後人尋

向所誌迷不得道路此陶元亮作桃花源記今有武陵縣卽此辰州府出丹砂大酉山在府城西道書爲二十六天酉華妙洞天山顛有善卷墓小酉山山下有石穴其中舊有書千卷相傳昔人避秦隱學于此委羽山乃委羽洞大有虛明天在武州司馬季主遇西靈子都授道理委羽山西靈子都太玄仙女也又黃庭真人王探字養伯漢呂太后時亦遇西靈子都得道理委羽大有宮又劉奉林亦入委羽山修道永州府九疑山在寧遠縣南九

嶷山在衡永之間其山九峰皆參差相似望而可  
疑故名九峰曰朱明石城石樓娥皇舜源女英簫  
韶桂林杞林紫陽真人周義山於九嶷山遇李伯  
陽授李氏幽經沈文泰九嶷人得紅泉神丹法去  
三尸成仙九嶷真人韓偉遠授道於中岳宋德玄  
德玄周宣王時人服靈飛六甲得道偉遠得而成  
道今處九嶷山雙襲祖刻志誦黃庭經悟道居九  
嶷山漢末張禮正受西城王君虹景丹內外洞徹  
睥明身輕入九嶷山俞靈瓚授迴風之道守明之  
注於南岳赤君行之二十年能坐見天下事如視  
諸掌後仙去入九嶷山何侯者堯時人隱蒼梧山  
夏禹時五帝賜藥一器一家三百餘口俱昇今爲  
太極仙人襄陽府均州太和山舊名峯嶺近尊爲  
太岳山之絕頂中間曰天柱峰高出平地萬丈居  
七十二峰中玄帝於此冲舉按新都白岳與此太  
和竝是玄帝成道棲神現聖大道場此山峰巒雄  
秀宮殿偉麗仙都靈境參差合沓不可名狀別有  
記我朝張三丰祖師亦修道于此有會仙館又陰

長生真人得馬明生太清金液神丹入武當山石室中合丹先服半劑後冲舉廣東古名南海又名嶺南羅浮山者二山合名也浮丘山浮在海水中心而與羅山合故名羅浮山有洞通句曲又有璿房瑤室七十二所又有神禽玉樹朱草爲朱明耀真之天名山略記曰羅浮山有阿育王塔三十二所浮丘山者乃浮丘丈人得道之地葛洪乞句漏令將就句漏煉丹砂行至廣州爲刺史鄧嶽畱不聽去乃止羅浮山煉丹又單道開亦得道此山道開嘗見石季龍與佛圖澄語不能屈也顏真卿化後有人至羅浮山真卿令寄書與子孫子孫得書大驚曰此先太師親翰也軒轅集得道於羅浮唐明皇亦嘗召見石杏林授度張紫陽後人見之羅浮山在增城博羅二縣之境白雲山乃安期生飛昇之地韶州寶林寺乃六祖禪栖又轉于大梵寺轉妙法輪并受無相心地著壇經以明大法後又返曹溪故又爲曹溪心印曹溪卽在韶州後又歸新州國恩寺示化達磨井在府城中梁時達磨祖師

指其地謂人曰下有黃金民爭鑿之得甘泉而無  
金人以爲誑達磨曰是金未易以斤兩計也鮑靚  
爲南海太守後得道女妻葛洪曰鮑姑亦同洪仙  
去廣西古名八桂梧州府北流縣句漏山道書第  
二十二洞天葛洪請爲令欲就而煉丹砂乃不果  
至雷浮羅

潯州府白

石山乃道書第二十一洞天白玉蟾姓葛名長庚  
瓊州府瓊山縣人四川古名巴蜀又名益都杜宇  
爲屬主蜀嘗大水後鼈令者開峽治水人得陸處

宇禪位與之處西山得道成都府玉女山在簡縣  
李八百修煉於此有石乳房土人呼爲玉華池又  
云李八百于漢州金堂山白日冲昇臨邛鶴鳴山  
乃馬成子得胎元煉氣之法修道于此後張道陵  
亦居此山得道青城山在灌縣杜光庭記岷山連  
峰接岫千里不絕青城乃第一峰也前號青城山  
後名大面山有七十二小洞應七十二候有八大  
洞應八節道書以此山爲第五洞天乃神仙都會  
之府有甘露芝草天池醴泉窰封先生栖青城山

黃帝師焉授以龍躡經卽此也黃帝至青城山謁中黃丈人馬明生將陰長生入青城山授太清金液神丹老君授天師張道陵正一盟威治鬼法乃于蜀山斬蕩萬鬼遂命五方八部六天鬼神會盟于青城山黃帝壇下使人處陽明鬼處幽暗執丹筆曰吾筆所指鬼衆盡滅人鬼分治幽明異境不欲盡滅鬼類卽與盟誓折石爲契王方平得道位西極西城真人領仙士萬五千人鎮青城山九仙寶室之天陶弘景真誥云洪崖先生今爲青城洞真人又漢武帝時王谷神栖于青城武帝封爲太素先生後控碧騾上昇又羅公遠煉丹于青城山之西峰真一子彭曉居青城山修道注陰符經有人見于山中立松栢之上飛去楊通幽授道于青城真人劉無名人青城山遇青城真人劉祈叩不已真人令齋心七日而示其陽爐陰鼎胡剛子陰長生金液九變神丹劉得而修煉三年仙去李浩於青城山得爾朱先生授道作大丹詩百首行于世後不知其所終大面山亦時有仙靈栖真成道

吳郡沈羲學道於蜀中老君遣仙官薄延司馬季  
主徐福羽衣持節以白玉冊青玉界丹玉字授羲  
碧落侍郎同時昇天陰文祥行七七俗多呼殷七  
七賣藥療疫厲入口而愈種瓜釣魚如葛仙公術  
甚神鵠林赤杜鵑花勅花神令非時盛開所至現  
種種靈異後賣藥入蜀保寧府靈臺山在蒼溪縣  
一名天柱張道陵昇仙於此有麻姑洞順慶府金  
泉山在府城西唐女仙謝自然於此白日飛昇自  
然欲航海求蓬萊海邊有仙人指以求天台司馬

子徽成道子仙山在廣安州漢馮緄之子馮真人  
修煉於岳門山一旦仙去別父母來晨白鶴飛翔  
爲候父母登此山望之又各望子山重慶府酆都  
縣東北平都山道書七十二福地之一王方平陰  
長生俱于此得道昇仙翟法言夔州府雲陽縣人  
唐玄宗時授神人寶笈靈文得道欲平雲安十五  
灘以便行人十四灘神俱至獨一灘神後至乃一  
女子陳貧民仰食挽負灘不可平遂已雲安卽雲  
陽峩眉山在峩眉縣大峩山兩山相對如峩眉故



名又有小峩山與大峩山連又有中峩山亦名綏山諺云得綏山一桃雖不得仙亦足以豪周成王時有葛由騎木羊上綏山峩眉山登之有雷洞坪有禁人語鐵牌恐風雷忽震轉八十七盤上娑羅坪有娑羅花六月冰雪寒慄異常佛殿有銅鐵錫三殿有白水寺黑水寺此山乃普賢菩薩道場也西域千歲和尚寶掌云三峩高出五岳秀甲九州震旦國第一山也黃帝至峨眉山北岩謁天皇真人受三一之道呼應臺在峨眉縣乃孫真人謝唐

明皇賜武都雄黃處王喬健爲人健爲縣有北平山在益州南一百四十七里上有白蝦蟆謂之肉芝王喬得而食之仙去滇南鷄足山去大理府百里乃釋迦大弟子迦葉之所藏修又有華首門乃迦葉禪定處又有傳衣寺釋迦佛一日拈起一花示迦葉微笑遂授以正法眼藏涅槃妙心并付衣鉢故寺以傳衣名也蓋滇中爲西域西南之境故釋迦迦葉傳道於此余因而稍考究西方佛國大略西域天竺國一名身壽古七佛生焉釋迦牟尼

佛生于西方迦毘羅國姓刹利生有三十二相八十種好乃淨飯王之子母摩耶夫人妻耶須公主棄太子位修道於雪山六年成無上菩提子羅睺羅亦出家得道爲佛法教主此外羅閱城南印度東印度于闐罽賓疎勒康國烏菴烏那富樓叉曷乾陀獅子焉耆大月氏小月氏越底延臨兒波羅拘尸羅摩突羅叱利摩伽陀迦摩羅提伽華氏毘舍利波羅奈摩提那提中印度泰斯摩訶賴羅衛和訶條舍衛迦維羅越那訶維摩竭陀諸國俱是

佛國奉佛惟謹自漢明帝得金人之夢遣使天竺摩騰法蘭來而佛經始入東土自初祖達磨由天竺踏蘆東渡而後西教東流自初祖以至六祖不立文字見性成佛悟明心地謂之頓法名爲南宗自神秀大師拂拭塵埃去垢修行謂之漸門名爲北宗此後佛法大盛叢林道場殆遍震旦沙門居士悉歸三寶而西方祖師亦往往現化東土如普陀大士奉化布袋峨眉普賢五臺文殊赤縣神州遂成佛國矣夫名山洞府仙佛栖託余則記之其

止於溪山秀美騷墨遊賞者在所略也余此書蓋  
專考玄神之靈蹤蒐綠韞之秘檢以興起學道人  
之志趣故不暇旁及也嗟乎余之機緣不知當在  
何山片石乎精堅之入水神當告我矣

海運與夫共介於世

鳥道集卷之三十一終

